



*JABATAN PERKHIDMATAN VETERINAR MALAYSIA*

# **LAPORAN LIPUTAN MEDIA**

**30 Julai 2020**

1. Penternak sedih lembu tidak laku

OLEH:

**SEKSYEN KOMUNIKASI KORPORAT DAN ANTARABANGSA  
BAHAGIAN PERANCANGAN  
JABATAN PERKHIDMATAN VETERINAR MALAYSIA**

# KERATAN AKHBAR

Tarikh: 30 Julai 2020

Media Cetak/Elektronik	Kosmo	Catatan:
Ruangan	Negara	
M/Surat	2	
Perkara	Usahawan	

Permintaan haiwan korban pada Hari Raya Aidiladha merosot lebih 60 peratus

## Penternak sedih lembu tidak laku

Oleh ABDUL RASHID ABDUL RAHMAN dan NORADILA MAHAMAD

**BENTONG** – Kemeriahan ibadah korban tahun ini agak suram berbanding tahun-tahun sebelumnya apabila ramai daripada umat Islam memilih untuk menangguhkan ibadah itu susulan pandemik Covid-19.

Paling menerima kesan pastinya penternak lembu apabila haiwan peliharaan mereka kurang mendapat permintaan daripada orang ramai untuk melakukan ibadah korban.

Difahamkan, jumlah permintaan haiwan untuk korban di seluruh negara pada musim Hari Raya Aidiladha tahun ini mengalami kemerosotan sehingga lebih 60 peratus.

Seorang penternak, Zainul Zaman Mahalim, 57, dari Kampung Lebu di sini, berkata, kebiasaannya dia mampu menjual sehingga 70 ekor lembu korban, tetapi kini hanya 15 ekor yang dapat dijual.

Dia yang mempunyai kira-kira 300 ekor lembu pelbagai baka berkata, wabak Covid-19 yang memaksa pelbagai prosedur ditetapkan dalam ibadah korban menyebabkan ramai individu menangguhkan ibadah korban.

"Sejak memelihara lembu 25 tahun lalu, tahun ini menyaksikan jualan lembu semasa Hari Raya Aidiladha begitu sedikit sehingga



**ZAINUL tetap reda apabila ramai pelanggannya terpaksa membatalkan tempahan lembu untuk ibadah korban ekoran pelbagai SOP yang ditetapkan kerajaan akibat pandemik Covid-19.**

memberi kesan kepada saya dan juga penternak lembu lain.

"Pelbagai prosedur operasi standard (SOP) yang terpaksa dilaksanakan dalam mengekang wabak Covid-19 menyebabkan ramai menangguhkan ibadah korban, malah terdapat pembeli yang telah membuat tempa-

han membatalkannya pada saat akhir," katanya ketika ditemui di Kampung Lebu di sini semalam.

Dalam pada itu, beliau berkata, wabak Covid-19 yang melanda negara turut memberi kesan kepada pendapatannya apabila orang ramai terpaksa berjimat cermat dalam perbelanjaan akibat kehilangan pekerjaan.

"Walaupun jualan lembu berkurangan tetapi perbelanjaan bagi memberi makan dan menguruskan haiwan peliharaan itu semakin meningkat dari semasa ke semasa," katanya.

Seorang penduduk, Azrul Rizuan, 34, berkata, keluarganya

yang merancang mengadakan ibadah korban di Chemomoi di sini terpaksa membatalkan hasrat tersebut kerana tidak mendapat kebenaran untuk mengadakan korban di rumah.

"Saya bimbang jika ibadah korban di rumah akan menyebabkan penularan wabak Covid-19," katanya.

**Di Terengganu**, seorang penternak kerbau, Ezril Hisham Abd. Rahman berkata, hanya lima ekor kerbau ternakannya ditempah untuk ibadah korban pada tahun ini berbanding 15 ekor tahun lalu.

"Ramai yang mengambil keputusan menangguhkan hasrat melakukan ibadah korban ekoran pandemik Covid-19.

"Ini pertama kali saya menerima tempahan paling sedikit sejak lima tahun menjadi pembekal haiwan ternakan untuk ibadah korban," katanya.

**Di Selangor**, Pengerusi Biro Dakwah Surau Al-Amin Seksyen 8, Bandar Baru Bangi, Suhaimi Ramli berkata, pihaknya masih mengekalkan jumlah korban seperti tahun sebelumnya iaitu sebanyak lima ekor.

"Apa yang berbeza mungkin suasananya kerana proses penyembelihan tahun ini dibuat di pusat penyembelihan di Bandar Seri Putra berbanding di kawasan masjid sebelum ini," katanya.